

## ՀԱՅԱԳԻՏԱԿԱՆ ՀԱՆՂԵՍՆԵՐԻ ԽՄԲԱԳԻՐՆԵՐԻ ԽՈՐՀՐԳԱԿՑՈՒԹՅՈՒՆ

Ս/թ. հոկտեմբերի 8-ին Երևանում, ՀՍՍՀ ԳԱ «Պատմա-բանասիրական հանդեսի» խմբագրությունում տեղի ունեցավ հայագիտական երեք պարբերականների՝ «Պատմա-բանասիրական հանդեսի» (Երևան), «Revue des Etudes Arméniennes» (Փարիզ) և «Հայկական հայագիտական հանդեսի» (Բեյրութ) խմբագիրների խորհրդակցություն, որի ընթացքում քննարկվեցին ժամանակակից հայագիտության մի շարք խնդիրներ, երեք հանդեսների փոխադարձ կապի և օգնության հարցեր:

«Revue»-ի խմբագիր Ժան Պիեռ-Մահեն, խոսելով հանդեսի հիմնական նպատակների մասին, մասնավորապես նշեց, որ խմբագրությունը աշխատում է որքան հնարավոր է Արևմուտքի ընթերցողներին լայնորեն ծանոթացնել հայագիտական այն նոր գրականության հետ, որ լույս է տեսնում Սովետական Միությունում հայերեն ու ռուսերեն լեզուներով:

— Այս հարցում, — ասաց նա, — մեզ հատկապես զգալի օգնություն կարող է ցույց տալ Հայաստանի ակադեմիայի «Հանդեսի» խմբագրությունը: Մենք կտպագրենք գրախոսություններ և գիտական ինֆորմացիաներ Հայաստանի հայագիտական հրատարակությունների և գիտական համապատասխան հիմնարկների աշխատանքի մասին: Ցանկալի է որ մեր հանդեսում ավելի հաճախ հանդես գան սովետահայ հայագետները:

Բեյրութի «Հայկազյան հայագիտական հանդեսի» խմբագիր Երվանդ Քասունին, որն իր թեկնածուական դիսերտացիան պաշտպանել է Երևանի պետական համալսարանում, խոսեց այն դժվարությունների մասին, որոնք կանգնած են հանդեսի խմբագրության առաջ:

— Սակայն, շնայած դրան, — նշեց նա, — մենք արդեն հրատարակել ենք 6 հատոր և գործադրելով ամեն ջանք, աշխատում ենք ապահովել հանդեսի հետագա հրատարակություն-

ներ: Մեր խմբագրությունը կարիք ունի գիտական հոդվածների Ուրախ կլինենք, եթե Հայաստանի հայագետները իրենց ուսումնասիրություններով և գիտական կոնսուլտացիաներով մասնակցեն մեր հանդեսի հրատարակության գործին: Միաժամանակ ցանկալի կլինի, որ «Պատմա-բանասիրական հանդեսում» տպագրվեն սփյուռքահայ հայագետների հոդվածները: Ցանկալի է նաև, որ «Հանդեսում» ավելի մանրամասնորեն լուսարանվի սփյուռքահայության հասարակական-մշակութային կյանքը:

Հայագիտության մի շարք հաջողությունների մասին խոսեց «Պատմա-բանասիրական հանդեսի» խմբագիր Մ. Գ. Ներսիսյանը:

— Անելիքները, սակայն, դեռ շատ են, — ասաց նա: — Ըստ երևույթին, հարկավոր է անհրաժեշտ ուղղորդություն դարձնել հայ և մյուս ժողովուրդների անցյալի պատմական, քաղաքական ու մշակութային կապերի և փոխադարձ ազդեցությունների լուսարանման պրոբլեմի վրա: Կարևոր է, որպեսզի հայտնաբերվեն ու հրապարակվեն արտասահմանյան արխիվներում ու ձեռագրերում գտնվող այն նյութերը, որոնք վերաբերում են հայ և հարևան ժողովուրդների պատմությանը և մշակույթին: Կարելի է սկիզբ դնել համատեղ ուսումնասիրությունների: Կարծում ենք, որ արտասահմանյան հայագիտական պարբերականներում կարիք կա, որ ավելի շատ էջեր նվիրվեն Սովետական Հայաստանում հրապարակվող հայագիտական ուսումնասիրություններին:

Խմբագիրները եկան այն եզրակացության, որ անհրաժեշտ է ուժեղացնել հայագիտական հանդեսների գիտական կապերը և փոխադարձ ինֆորմացիան, ինչպես նաև հաշվի առնել խորհրդակցությունում արտահայտված ցանկությունները:

Ն. ՎԱՐԴԱՆՅԱՆ